

求闕齊弟子記

求闕齋弟子記卷二十九

東湖王定安纂

東治三

兩淮鹽政

前明鹽法兩淮歲行四百觔大引七十萬五千一百八十引我朝定鼎剖一爲二以二百觔爲一引共行一百四十一萬三千六百引內派淮南行一百十八萬一千二百三十七引淮北行二十二萬九千一百二十三引每引納銀六錢七分此正綱也其有加於正綱之外者如安徽之甯國和州含山江南之江都清河山陽桃源宿遷邳州贛榆睢甯沭陽等州縣原食綱鹽順

治八年另加食窩十六萬七千三百九十八引謂之食鹽加窩
又前明甯夏用兵議加甯餉滴珠二項順治十年將此項頒引
目九萬二千六百九十七引十七年巡鹽御史李贊元題准帶
課不行鹽其課帶入正綱謂之甯珠又順治十三年戶部請加
兩淮鹽十六萬引亦經李贊元題明帶課入綱謂之新增又上
元八縣改行食鹽九萬六千七百引亦請帶課不行鹽謂之八
縣歸綱又康熙十四年科口余國柱奏准改割沒爲加觔每引
加鹽二十五觔加課二錢五分兩淮增鹽十七萬餘引增課四
十萬五百餘兩謂之加觔又康熙十七年御史傅廷俊題請鹽
引加丁議加二萬七百四十二引謂之加丁又湖南衡永寶三

府前明借行粵鹽順治十八年復令食淮分行八萬一千七百六引採入正綱帶納謂之三府復准以上七款皆加課而未入於額引也以後綱額觔數時有增減至道光二十九年淮南改行票法以四百觔爲正引加貼餘鹽二百觔己酉庚戌兩綱實應造報湖廣江西安徽江蘇四省並永順永綏邊鹽江甘高寶泰興食鹽總共一百九萬五千五百十引辛亥綱票鹽壅滯壞商販公稟由司詳院批准改爲每引六百觔照引半納課共運鹽七十三萬三百四十引核其引數銀數與己庚二綱相符行未半而粵亂起遂停綱咸豐四年部科以停綱久議仿明王守仁就場抽稅之法檄淮試辦署運使淮揚道郭沛霖設法試行

定以每鹽百觔抽食稅錢百五十出江倍之各場奉行不力或
三石抽一或五石抽一更有十石抽一者復設巡卡二十餘處
補漏稅及不足者行二年餘收稅錢數十萬緡七年秋署運司
喬松年受篆前江蘇布政使聯英副之議改稅鹽法於泰州設
總局通泰分司另刊大票以八十五觔爲一包成引征正雜課
銀二兩三錢五分行之年餘舊商漸集九年夏聯英議撤兩分
局統歸舊商承辦每年包納稅銀以二十四萬引爲率多運者
聽而每年所銷僅十餘萬引蓋先設分局足收化私爲官之效
一經商辦則私梟從而侵占之然欲行綱鹽復舊規則必以商
辦爲宜咸豐十年四月公履兩江總督任時尚在安徽軍次卽

疏言鹽場爲大利所在若就場征課經理得宜較近歲所入可多得百萬以外宜辦淮揚水師以保鹽場薦福建延建邵道李鴻章爲兩淮鹽運使使興水師護鹽場疏通引地事未果行厥後軍書旁午倥傯未暇十一年八月大軍克安慶江路漸通湖北江西皆有淮鹽運販沿江設卡抽釐以餉軍而川私粵私充斥湘鄂淮引滯銷公乃建疏銷輕本保價杜私之議商民便之今錄其奏議章程如左

同治元年十二月奉

上諭淮南鑾務廢弛已久現在運販楚北者劣員奸商居多曾國藩雖設卡抽釐而所得未多前據戶部飭該大臣酌提成本

由官督運則利權操之自上而於皖浙軍餉必能稍資接濟茲據中允錢寶廉與戶部前奏是否可行著會國藩一併悉心議奏欽此 二年四月公覆疏曰臣奉

諭旨當卽轉行兩淮鹽運使喬松年議覆去後茲據該運使詳稱竊繹戶部之意係欲加徵課銀收回引地以冀漸復舊規又恐商販不前改由官運洵是籌辦南鹽至要之策無如引地爲鄰省侵占籌銷極難正課因釐捐過多加增非易上年江路漸通楚西兩岸亦嘗招商試辦乃以淮鹽久不到岸所銷盡是川鹽粵鹽蓋川鹽之成本較輕賣價可減淮鹽之成本較重賣價獨昂故淮鹽之疲滯斷不敵川粵各鹽之旺銷則商旣不前卽

官運亦恐無起色至部文所稱仍以四百觔爲一引令繳正課每引三兩七分三釐零係照承平時科則而言現在除完課外運司衙門所收釐金及沿江各釐每鹽一票約共完十五兩以上釐捐如是之重是以試運楚西之鹽止能照稅鹽章程完納稅鹽每票九百觔僅完課銀一兩八分尙且無利可圖今欲以四百觔鹽完三兩有零之課其勢更有難行蓋淮南目下情形不患無商可招而患無利之可獲惟有將楚西兩岸銷路大加整頓仍由運司衙門招徠新舊各商運赴楚西銷售以期淮鹽逐漸進步爲得寸得尺之計前經都統富明阿奏請招商旅旋派知府杜文瀾前往楚北試辦如果辦有成效再當另議章程

詳辦等情具詳請奏前來伏查各軍餉絀是臣之隱憂兩淮鹽務是臣之專政楚西兩岸被粵私川私侵占太久斷非一蹴所能挽回此時必欲爭回引地非大減賣價則不能敵鄰私非先輕成本不能跌賣價據現行事例九百觔一引者並鹽本稅稞釐金運腳拖費計算幾及四十兩成本已屬極重若如部議改爲四百觔之引加爲三兩有零之課又以重價購買之輪船拖帶試行之官鹽則成本更重安能敵鄰私而暢銷路若將各處釐金概議裁減則下而鎮揚滁州之軍餉上而九江湖北之關釐皆將向臣處索取而臣軍除沿江鹽釐外亦別無可籌之餉實有不能終日之勢臣悉心酌核官運雖屬良法目前尙多窒

擬應暫照該運使所議俟富明阿派辦之官鹽試行有效再行另擬章程奏明辦理

同治三年正月公疏言淮南鹽課甲於天下自長江梗阻引岸廢弛疊經前督臣於咸豐四年奏辦就場抽稅販戶下場細鹽收課甚微又於七年奏改設局征稅令水販就棧採買稍有成效但每年所征課銀較全盛時尚不及十分之一總因楚西引地未通鹽無去路是以課無來源現在江路肅清運道暢行無阻所有楚西各岸自應趕緊設法運鹽濟售力圖整理而籌辦之難大端有二一在鄰鹽之侵灌太久西岸則食浙私粵私而兼以閩私楚岸則食川私粵私而兼以潞私引地被佔將及十

年民既借此以濟食官亦借此以抽釐積重難返久假不歸勢不能驟行禁絕一在釐卡之設立太多淮鹽出江自儀徵而金柱關而荻港而大通而安慶而華陽鎮以達於楚西層層設卡處處報稅均以鹽釐爲大宗諸軍仰食性命相依勢不能不概行裁撤臣博訪衆論核定新章按切今日之時勢仍仿昔年之成法大致不外乎疏銷輕本保價杜私四者請爲我

皇上粗陳其畧自鄰鹽侵佔淮界本輕利厚淮鹽不能與之相敵江楚百餘州縣徧地皆是查之不勝其煩堵之且恐生變計惟重稅鄰私俾鄰本重而淮本輕庶鄰鹽可以化私爲官而淮鹽亦得逐漸進步現已咨明湖廣江西各督撫將鄰私釐金酌

量加抽聽鄰鹽與淮鹽並行不悖譬之田產被客民佔據田主
初歸姑與客分耕而食待至淮運日多然後逐佔田之客申鄰
鹽之禁此疏銷之畧也近年楚西之鹽每引完釐約共在十五
兩以上所分濟者下游爲都興阿之餉馮子材之餉李世忠之
餉上游爲臣與官文部下之餉皆萬不可停者臣與各處咨商
鹽釐不能全停未始不可暫緩除揚鎮兩防宜照舊額外其餘
未始不可少減臣酌定新章前之逢卡抽收者今改爲到岸售
銷後彙總完釐分解各軍前之收十五兩有奇者今改爲楚岸
每引抽銀十一兩九錢八分西岸每引抽銀九兩四錢四分皖
岸每引抽銀四兩四錢旣減釐以便商又先售而後納此輕本

之畧也商販挾資求利無不願價常昂保而無失然不由官爲
主持往往見小欲速跌價搶售其始一二奸商零販但求卸貨
而先銷不肯守日而賒利其後彼此爭先愈跌愈賤如風捲潮
退雖欲挽回以保成本而不可得官與商俱受其害現於楚西
各岸設立督銷局派委大員駐局經理鹽運到岸令商販投局
挂號懸牌定價挨次輪銷時而鹽少小民無食貴之虞時而銷
滯商民無虧本之慮此保價之畧也鹽法首重緝私大夥私梟
明目張膽猶不難派兵捕拿最易偷漏者包內之重斤船戶之
夾帶所謂官中之私查禁尤難現經改復道光三十年舊章每
引正鹽六百斤分捆八包每包另給滿耗七斤半包索三斤半

共重八十六斤由臣刊發大票隨時填給並於大勝關大通安
慶等處派員驗票截角如有重斤夾帶立即嚴加懲究提鹽充
公其各岸之兼行鄰鹽者亦必另給稅單苟無單而販私卽按
律而治罪此杜私之畧也茲四者均就目前之要務及道光年
間之成規參酌而損益之無論官運營運悉照商運辦理至應
完課銀因鹽釐爲數過重未能遽議加增仍照咸豐七年奏案
征收向來鹽課按半年奏報一次今擬將各處彙收之釐亦分
上下半年隨課並報以便部臣有所稽考惟兵燹之餘戶口大
減以今日之民數較承平之引額恐運銷不及一半加以鄰私
充斥挽復非易殷商絕少招徠尤難能否漸有起色殊無把握

臣惟有督飭運使忠廉實力講求以期

國課軍需兩有裨益

同治三年十一月奉

上諭戶部奏推北票鹽提充軍餉請分別截留以保正課一摺亦因苗逆伏誅皖徐平靜淮北銷路漸通亟將餉鹽分別截留以挽頽綱而裕正課著會國藩嚴飭鹽運司忠廉設法遵照辦理欽此 三年八月公覆疏曰伏查淮北鹽務自前督臣陶澍改行票鹽意美法良商民稱便果能率由舊章可行之百年不改無如軍興以後運道之通塞靡常銷數之暢滯無定鹽既不

能如額運售課卽不能按綱造報拖延套搭已覺年不如年然

未辦餉鹽以前票販雖日形竭蹶而尙能勉力從公他商雖難免偷漏而未敢任意售私迨軍營提鹽抵課變易舊規營員日出於其塗商販遂聞而却步李世忠部下赴壩領鹽尤屬桀驁一不遂欲百般恐嚇甚至因棧鹽不足下場自緝一營開端各營效尤護私夾私之弊遂至不可窮詰現在李世忠業經開缺其部下兵勇亦皆遣散當此推甸澄清自宜恪遵

聖諭將餉鹽截停招集新舊票販運鹽完納現課出湖銷售臣旁咨博採參考成法核議新章約有必須停止者三急宜整理者四請爲我

皇上陳之漕臣以清淮防費至絀先令場商每包捐鹽五斤每

引共二十斤旋因逐包捐繳諸多未便由海州分司詳每運鹽百包帶繳五包其應完課銀及售出鹽價雖經吳棠奏明作爲清淮軍需但錙銖而取之瑣屑而派之殊非政體所宜此必須停止者一也徐州係山東引地前因捻匪梗阻東引未能到岸經督辦徐宿軍務田在田奏准借運北鹽劃收東課原係暫時權宜之計行之日久流弊滋多採買則私自赴場售銷則旁侵皖界刻下東引業已通行皖民無虞淡食不能再託借運之虛名貽侵銷之實患此必須停止者二也北鹽向有淨鹽毛鹽之分已改捆者爲淨鹽未改捆者爲毛鹽皆須納課方准出湖近來私梟勾竄營弁朋販毛鹽結隊橫行連檣闖越堵之嚴則營

買出而包庇緝之疎則官引盡被占銷此必須停止者三也夫
權鹽之法革其弊而利自興餉鹽停則強封害販之弊除捐鹽
停則科歛病商之弊除借運朋販之鹽停則引界混淆營私充
斥之弊無不除臣所謂整理之四端蓋亦就諸弊既去因勢利
導耳淮北綱引前係奏至戊午綱而止今於五月初五日接開
己未新綱惟兵燹以後戶口大減斷不能銷至四十六萬引之
數應循照兩年奏案先辦正額二十九萬六千九百八十二引
每引例收報部正課一兩五分一釐雜課二錢又外辦經費四
錢倉穀何費鹽捕營各一分此外如團練壩工緝費號項等欸
名目太繁一概刪除以紓販力此現籌整理者一也近來軍餉

皆賴鹽釐接濟勢不能概行裁撤而長淮處處設卡商販視為畏途且從前各卡總計每包約須完釐二千餘文爲數過重自應大加核減今擬做淮南總收分解辦法歸併兩處自西壩出湖先在五河設卡每包收釐錢五百文運赴上游再於正陽關設卡每包收釐錢五百文他卡只准驗票不准重抽由臣選派委員駐卡經理蓋非減釐不足以輕本非裁卡不足以卹商此現籌整理者二也淮北解餉原案向以十成分攤臨淮軍營分四成滁州李營分四成安徽撫營分二成今臨滁兩營業已分別裁并自可將該營舊有之餉改撥金陵一軍稍解燃眉之急惟漕臣停止捐鹽亦應量予撥濟以資貼補嗣後所收課釐已

咨明吳棠喬松年應仍以十成分派臣營派五成撫營派四成
漕營派一成論兵數則小有裒益論舊例則無甚更張此現籌
整理者三也北鹽每引例定正鹽四百斤分細四包連滷耗重
一百十斤近來棧鹽出湖皆在西壩改細大包重一百二三十
斤不等以省運脚及按包抽釐之費換包後鹽票不符叢生弊
竇臣已嚴申禁令不准改細大包並於例給大票外將每船裝
鹽包數亦倣淮鹽之例填給船戶清單庶鹽與票符可杜就重
而避輕不致以多而報少此現籌整理者四也以上各條係就
戶部原奏及御史劉毓楠之條陳悉心參酌力挽近年之秕政
悉復疇昔之成規而又恐積弊已深一旦改收現課各販不甚

踴躍更議輔以官運照商販一律辦理以示倡導惟北近年以來綱法紊亂開綱既無定期奏銷亦無定限目下新章既定臣嚴飭運司督同海州分司廣爲招徠源源認運仍限一年造報奏銷以符定制但例銷北鹽口岸疊被苗捻蹂躪之後不但煙戶凋零人民稀少且未經開綱以前存積餉鹽捐鹽販鹽爲數不少舊鹽之占壓太多新鹽之售銷難速勢有必然又皖之潁六廬鳳豫之信羅光逼近捻氛軍情變幻刻刻可憂課項能否如額收足奏銷能否依限造報未敢信有把握其五河正陽關所收鹽釐將來自當隨同正課一并報部以重欸項惟因餉需緊要此時所收鹽課只能支應軍需未能先運京餉私衷耿耿

抱疚良深臣惟督率運司忠廉殫盡血忱實力經理以仰副
皇上整飭鹽綱之至意

同治七年十月公疏言淮南引地定額最多銷鹽最廣從前淮
綱盛時歲徵各岸課鹽甲於天下其徵諸蘇省者不及十之一
徵諸江西安徽者不過十之三徵諸兩湖者則居十之六是淮
綱之興替全視楚岸之暢滯爲轉移軍興以後長江梗塞淮鹽
不能行楚經楚省督撫奏明借食川鹽原爲權宜之計臣於同
治二三年間整理鹽務維時淮南卽以收復楚岸爲請祇因引
地被占十有餘年行之旣習爲常禁之未便太驟是以暫將鄰
鹽釐稅酌量加重原冀川私本重而日衰淮鹽漸進而日旺不

謂川販巧於趨避百計漏釐每運兩引之鹽僅完一引之稅臣訪其弊上年會派委員至宜昌會同楚省委員公同掣驗本年又減淮鹽之釐期收敬私之效非不多方補救乃查鄂湘兩局積壓淮鹽不下十餘萬引存數極多銷數滯而川私紛至沓來較前尤盛推原其故總由鄂省利食川鹽雖有掣驗之名而明讓斤兩近聞宜昌抽收川稅仍不過六七折以致川販成本太輕來源愈旺是前此繞越而偷行者今更肆行而無忌川鄂官商幾忘引地之應屬何省請舉淮之受害於川者數端縷晰陳之淮鹽逆流上駛歷長江洞庭之險每船至少須裝千餘包船笨載重計自瓜州開行非四五個月不能達鄂非六七個月不

能達湘偶遇暴風小磯立時淹消巨萬本銀悉歸烏有川私則
自川江順流而下勢等建瓴雜用小船靈便異常計程途則淮
遠而川近論舟行則下易而上難此運道之捷於淮者其害一
也淮南之鹽以餘東呂四兩場爲通場之冠俗所謂餘呂眞梁
者也從前暢行楚岸其鹽色之潔由於商力充足本年所產之
鹽堆至次年始行開售堆愈久則鹽愈淨近年垣商疲乏隨收
隨售鹽質甚乾川販因之而居奇淮岸因之而日廢喧賓奪主
莫斯爲甚此鹽色之難於淮者其害二也淮鹽定章以五百引
起票係有鑒於道光末年改辦票運不拘引數聽商稟認厥後
承辦數千引之大販皆爲一二十引之小販搶運所誤故新章

定以限制一以杜無本冒充之弊一以驗有力承運之資計請
鄂湘引票五百引非現銀七八千兩不辦川鹽則計斤不計引
售資數百千即可辦運鹽皆散裝既官私之莫辦釐不預納亦
來去之自由此籌運之巧於淮者其害三也鄂湘兩局售鹽以
到岸之先後定出售之遲速鹽未到輪不准搶賣近數年來銷
雖極疲而商未跌價深得整輪之益但在船守風抵岸守輪計
一檔之鹽非一年之久不得脫銷川鹽則到處可售得價卽賣
銷路廣則窮鄉僻壤徧地皆私賣價輕則舖戶行家非川不蓄
此籌銷之便於淮者其害四也有此四害淮何能與川敵川鹽
一日不停淮鹽一日無暢銷之望意者謂川鹽停止於川省業

鹽人等有碍殊不知淮南通泰二十場垣商煎丁以及鈎損捆
忙人等不下數百萬戶兵荒年久困苦顛連爲從來所未有滿
望江路通行規復引地徐圖轉機不料鄂湘最暢之岸盡爲川
私所占西岸亦爲粵私閫私所占場運各商倒歇之家固衆而
煎捆各役失業之人尤多比之川省業鹽者何止數倍凡認淮
引之商屢赴臣衙門呈遞稟詞請堵川私幾無虛日譬之家有
田產任客民多年佔據爲尊長者忍視子弟之啼飢號寒而不
爲之救有是情乎至湖北軍餉原以川釐爲大宗刻下髮捻俱
滅軍事大定鄂省存營極少餉項足敷周轉况淮鹽內亦收鄂
釐淮銷果暢鄂餉卽因之而增此時堵止川私核與前准部文

三
侯准鹽暢應卽申明舊章嚴禁鄰私毋任侵佔等語實相脗合
請

旨飭下四川湖廣各督撫停止川私行楚以復昔年之舊制而
收經久之利權臣職司鹽樞歷有歲年所徵課銀因軍餉緊要
未能多籌解京私衷抱歉耿耿於心今雖交卸鹽篆猶思籌異
日之有餘補近年之不足我

朝鹽法沿於舊制畫分引地係大經大法一成而不可易今南
北軍務告竣而不力爭以圖規復則二百餘年之憲典自臣而
襲其拂逆商情歛一時之怨厥咎尙輕敗壞成法貽後世之譏
厥咎更重用是縷晰具陳如蒙

諭旨准禁川私應如何分立限期漸減漸停如何堵緝粵私潞私浙私閩私不復抽收鄰稅統由新任督臣馬新貽核議章程奏明辦理

同治十年二月督辦陝西糧臺侍講學士袁保恆奏請權加鹽價以濟軍需部議應由兼管鹽務各督撫轉飭各運司鹽道將現辦綱引地方能否計斤加價體察商力民情據實覆奏奉旨依議欽此公覆疏曰臣查袁保恆原奏意在停捐以除積弊增價以裕軍儲用意未嘗不善惟各省鹽法情形不同卽就准而論有窒碍難行者數端請爲

皇太后

皇上縷晰言之夫所謂加增鹽價者將加之於商乎商人運鹽不能零星起運淮南奏定章程以六百斤爲一引五百引爲一票資本不足一票者卽不准運今擬每斤酌加三四文約計每票須增成本一千餘串分言之則形其少合計之則見其多此時淮南通商迥非昔比類皆集資奏運商力實有未逮其窒碍難行者一也將加之於民乎近來西楚鹽價較承平時已屬騰貴一由鹽釐之過重一由銀價之過昂均以京外餉需緊迫未能減輕售價民間旣以鹽貴爲苦局中又以銷滯爲患若再按斤加價則水販無利可圖勢必開風而裹足梟徒有私可伺又將乘隙以賤售其窒碍難行者二也原奏謂一省獨加則滯各

省同加則通此固可免避貴食賤之患殊不知市價難齊物情使然不獨一省有一省之價卽淮南自附揚州縣起推而至於江甯皖省以達楚西此岸與彼岸價皆不同緣路有遠近之分卽價有低昂之判今欲比而同之雖法令亦有時而窮其窒碍難行者三也原奏又謂加價之款卽於各省鹽斤出場時隨同正課收納此亦可杜以多報少之弊殊不知淮南新章之尙易招徠者全在緩納課釐成本借以減輕轉輸可期便捷應納之課須緩至場鹽售與運販後再繳應完之釐須緩至到岸與水販後再繳引額以兩淮爲獨多加價卽以兩淮爲更鉅一旦責令商竈在於鹽斤出場之前完納巨萬鹽價勢有不能其窒碍

難行者四也以上各層係就淮南商力民情言之若論川淮交
匪則淮引受害爲尤深前此長江未通川鹽行楚同一占銷淮
地而彼時淮南兵燹之餘通泰二十場商逃灶困斂廢埕荒場
鹽旣不能達岸引地原不妨讓人自賊平以後另定新章新舊
各商添斂修埕逐漸整頓產數日增而湖北湖南爲銷鹽最廣
之區迄今盡爲川私所占現計存垣存棧存岸淮鹽積壓過多
苦無出路商人資本久擱年復一年運商則決裂堪虞場商尤
困窮無賴灶丁貧而生變亦屬意中之事譬之治河下游無歸
墟之處上游必有溢潰之患今欲求疏通淮銷非規復引地不
可欲規復引地非禁止川私不可臣於同治七年曾經剴切陳

奏而四川湖北湖南各督撫皆以軍餉爲重交章力爭部臣亦調停其間是江督之於川鹽方欲遏之使絕而楚省且招之使來臣目擊推引地面盡被川私佔奪不禁川則盡壞我

朝之成法欲禁川則先開鄰省之弊端辦理掣肘焦灼萬分部議謂節經江督奏請減價以敵鄰私推引尙難暢銷是淮南目前情形部中亦所洞悉臣斷不敢預存推諉不顧邊陲亦何敢稍涉遷就貽誤嵯局再淮南鹽釐項下有由場商捐輸內河鹽釐每引四百文先係分解揚州鎮江兩處糧臺充餉嗣因糧臺裁撤改撥京口綠旗餉銀等項之用歷年歸入淮南造報開單具奏在案茲查前項鹽釐起捐時係仿皖營漕營之案飭令場

商照捐分解專爲接濟軍餉而設現在東南軍務早經肅清各
場商因私鹽充斥岸銷疲滯轉輸不繼虧耗日增准鹽旣苦塵
封成本又多占擱幾有岌岌不可終日之勢據兩淮鹽運使方
濬頤稟請奏停前項鹽釐以紓商力前來臣查淮引滯銷場商
困苦係屬實在情形且皖營漕營之捐經前督臣馬新貽奏停
有案此項事同一律擬自同治十年正月止收捐其京口
綠旗餉銀另由藩庫籌解俾商本略予減輕庶垣產借資保固
同治十年三月戶部議復湖南巡撫劉崐奏請於永寶二府試
行官運粵鹽一摺衡州以下能否不致侵灌近來淮南鹽釐收
數遂形短少永寶二府係淮南口岸應由兩江督臣通盤籌畫

有無窒碍淮綱之處妥議覆奏奉

旨依議欽此公覆疏曰臣查湖南永州府一州七縣寶慶府一州四縣自康熙六年題准行銷淮鹽雍正乾隆時屢有改食粵鹽之議均經內外臣工奏駁有案前人立法具有深意行鹽必分界限係我

朝大經大法凡兩省接壤之區不許鄰私銷踰尺寸引界一定縱有奸民偷漏影射越境卽以私論民尙知所畏憚官亦便於稽查卽如蘇松常鎮皆係浙鹽引地與淮南場灶僅隔一江鎮江與瓜州淮棧僅隔咫尺路既便捷價亦輕減然必須行銷浙鹽而不能改食淮鹽者正以界限分明則紀綱永守也湖南之

永寶二府地居湘圻極邊又被粵私遍地侵灌淮鹽久已不至該處然不敢以二府改隸粵引者誠以永寶一經改隸則衡州亦將佔奪長沙亦將侵灌紀綱一紊萬事紛亂且留此二郡借以保長衡之藩籬尚可冀將來之暢旺且鹽政不敢棄引地而不顧猶之疆臣不敢棄邊邑而不守今兩廣督臣既咨稱窒碍難行而兩淮運司方濬頤亦詳稱湘省各商故不願以永寶引地改屬粵中所有湘省官運粵鹽行於永寶之處臣未敢輕於議准抑臣更有請者部庫餉源以鹽課爲大宗鹽課又以兩淮爲大宗而兩淮引地之被侵奪者湖北全侵於川鹽湖南則既見侵於粵鹽又大侵於川鹽臣初次奏定淮南新章但重加抽

鄰稅不還拒絕鄰鹽旋因軍務大定又於七年奏請禁止川私入楚無非欲收回引地冀復昔時之盛現查川私侵楚以鄰稅收數計之同治四五年間其勢稍衰自七年分逐漸加增八九年川鹽愈來愈旺照淮南之六百斤成引者計之每年占銷不下二十萬引蓋一萬二千萬斤之多而繞越夾帶漏稅之私者不在此數湖北九年分所銷淮鹽僅七萬餘引比川鹽銷數不過三分之一喧賓奪主莫此爲甚運庫課釐日減上年秋冬所收短絀尤甚以部撥

大婚彩綢之欸不能應解鹽積如山庫空如洗場商數百家艱窘尤甚現在存堆在途到泰到瓜之鹽共有五十餘萬引無處

銷售存堆者成本之占擱已多到瓜棧者有上倉住舡之費有換包折斤之耗公私之虧累尤巨日內紛紛至臣處呈稟請令運商先買繳價運商亦因楚岸不銷觀望不前今年垣產甚旺臣勉強借給銀十五萬兩令場商收買春產場商猶以欸少鹽多不能遍收深恐灶丁賣私通梟尤慮其貧極生變而舡戶數千亦因無鹽可運窮迫無聊蓋淮南自官商以至舡灶夫役數十萬人此兩月間皆皇皇焉若生計之將盡者不料鹽務竭蹶一至於此臣辦理不善咎固難辭亦實由楚南引地盡被川鹽侵佔譬之農家被人奪去田產舉室無措也部文有云通泰各分司場灶所產鹽斤無從銷售必致私梟競起關係全局所以

百數十年無有改易淮南口岸之議殆不啻目擊淮南近日苦
况矣臣於七年九月奏禁川私入楚一疏經戶部議准欽奉
諭旨飭李鴻章等撤局停稅飭吳棠封禁井灶並令覈議覆奏
旋於八年秋冬李鴻章覆奏川鹽未可卽禁者六端而議於沙
市設局以川鹽八成惟鹽二成配銷吳棠覆奏川鹽濟楚難以
遽停者四端而力言井之不宜封禁經戶部先後議覆均令前
兩江督臣馬新貽力圖補救妥商覆奏厥後沙市二八配銷之
局初議以斤計繼議以包計川鹽每包三百五十斤至八十斤
不等八成則近三千斤惟鹽每包連包索八十六斤二成則僅
一百七十二斤名爲惟占二成實則不及一成由此川勢日旺

淮銷日微淮商吞聲飲恨而無如之何今欲挽回一二惟求
皇上敕下戶部主持全綱剖斷是非縱不能全禁川私入楚亦
當使淮多於川保守

國家之大經大法或推八成而川二成或推七而川三川雖極
多亦不得滿四成庶幾官私判別成憲常昭其分成之法或指
明某府某縣暫准借食川鹽或鄂每歲准行川鹽若干萬斤不
許溢額但求部臣將大概規模斷定其餘細微條目臣當與川
楚諸臣妥商章程具奏凡疆吏辦事全賴各省和衷乃克有濟
向來江督鹽務本仗楚督緝私催銷始有起色道光年間林則
徐周天爵爲楚督時則淮鹽大暢他人爲督其時並無袒護川

鹽之事而苟非一心維持則淮銷常滯蓋責弁役以緝私課州縣以銷數均非本省大吏不足鞭策之也目今湖廣督臣李瀚章曾在臣軍久管糧臺相得益彰深知其顧全大局毫無私見於臣處事件無不竭力相助然外間頗議其袒護川鹽膜視淮鹽非與淮爲難也該督見水陸各營京協各餉需欸甚鉅恐一旦川鹽不暢餉項驟減前數係已成之規不欲自己而壞且見貧民散勇謀食於川鹽者多恐其失業滋事此二者籌之愈熟故於川鹽護之愈堅今欲楚岸鹽綱之平允但在楚督一心之轉移一心向川則川銷旺而衆商有恃矣分心向淮則淮銷旺而衆商亦有恃矣臣所求者淮鹽堆積場棧者五十餘萬引堆

積鄂湘者十餘萬引於此七十萬引中稍稍行銷楚岸則運商場商之氣爲之一蘇煎丁細役及謀食於淮之衆不至失業滋事卽爲大幸而淮南本分之引地不至棄而他屬亦臣盡職之一端至於餉項之贏絀則臣絕不敢爭昔年初定章程淮鹽行楚每引撥釐四兩二錢解交湖北糧臺後遞減爲二兩四錢初章撥釐銀六兩一錢二分解臣安慶糧臺後遞減爲三兩九錢二分七釐今欲鄂省減去川鹽入欵願將臣處應得釐銀多撥數成歸鄂抑或全數歸鄂如其全數歸鄂則每銷淮鹽一引鄂省可得銀六兩三錢有奇以近日銀價計之合錢十一千有奇較之鄂省銷川鹽六百斤僅收川釐十千有奇尙屬淮勝於川

於鄂省有贏無絀果能勤緝川私鄂中應無難辦之處倘蒙
皇上乾斷楚省引地必歸淮南作主其餘各節臣當與李瀚章
吳棠妥商無不通融辦理俟湖北酌堵川鹽稍有起色再商湖
南堵川之法續行奏辦

同治十一年正月公以楚岸淮南引地業經會商定議暫與川
鹽分界行銷會同四川總督吳棠湖南巡撫王文韶聯名上疏
曰伏查行鹽各有引界今以川淮兩省之鹽同行湖北一界之
內此暢則彼滯勢有必然近年淮南銷數日疲存鹽壅積無術
疏通皆由川鹽到處酒賣遂使淮引之界幾被川鹽占盡論鹽
斤則色白味鹹川貨本勝於淮論搬運則下水順流川路較近

於淮論民情則楚人食川習慣而已成自然論官事則川販聚楚驟禁而恐生事變故川私侵佔淮南引地雖屬大紊紀綱之事而有萬難遽變之勢今欲於積重難返之後挽回一二仍當暫分疆界爲徐圖規復之計湖北淮引之地九府一州此

國家之大法終古不變者也就川私侵淮之地而於其中收復數府專以淮綱酌分數府准銷川鹽此目下之權宜四面兼顧者也臣等函牘往來籌商再四就湖北九府一州計之現定將武昌漢陽黃州德安四府先行歸還淮南專銷淮鹽其安陸襄陽鄖陽荊州宜昌荆門五府一州仍准川鹽暫行借銷議定淮分之界不准川鹽侵入分寸而川分之界仍可由淮商就中酌

設子店撥售零引以明本係准引地方不可喧賓而奪主一割而永棄前於沙市所設配銷局既於川販多有未便而准銷亦並無成效應將此局裁撤移設新堤改爲分銷准鹽局至武漢黃德四府內湖北所設抽收川稅水陸局卡亦一律裁撤禁止川鹽不得顆粒侵銷四府引地此會議分界之大畧也准鹽滯銷之由固由川私充斥而銀價日昂鹽價日貴亦屬有碍銷路初定章時湖北每銀一兩約易錢一千五百餘文今則增至一千八百餘文居民買鹽則用錢而局中售鹽則收銀水販成本因之暗增不能不量子酌減查楚岸定章本定每引售銀二十四兩厥後遞減至十九兩二錢現擬每引再減售價一兩二錢

每正引六百斤定售銀十八兩所減之價在於應解鄂淮鹽釐內各半分扣將來銀價如跌再將鹽價隨時酌提以昭平允此減價之大畧也地方州縣本有緝私疏銷之責若不加意整頓深恐漏稅之川鹽雖申禁令而無稅之川私勢更蔓延加以潞私北私交相侵灌名雖定界仍無補於淮銷除湖北飭派緝私兵勇照常佈置外所有武漢黃德四府擬擇扼要之地設卡分堵凡潞私北私及川鹽越界漏稅之私仍由臣瀚章通飭各州縣不分畛域幫同局卡實力緝拿每年年終由督銷局會同湖北鹽道視銷數之暢滯定州縣之勤惰開具清摺迭由臣等會同考核酌量勸懲以收實效一面由臣國藩責成運司督飭各

場講求煎煉之法務使淮南鹽色日潔期與川鹽相敵倘有以醜劣低鹽運棧立將場員記過撤委此又講求緝務整頓鹽色之大畧也兵燹以後戶口大減各岸應銷之鹽較昔年額數已屬極少而業鹽以謀食人數日衆場井之產亦日多臣等不敢期銷數之極旺但求業淮鹽者不至因銷路被奪而遂絕生計業川鹽者不至因銷路被堵而別出事端是卽兩全之道此次分界之後如果淮釐方贏鄂釐日絀卽當貼補鄂餉期於勻分餘利而止如果淮銷仍滯川銷大暢卽當嚴堵川私期於不侵新界而止若其軍事大順滇黔肅清川鹽自有本管之引地則今日分割之五府一州仍當歸還淮綱淮南引地行之數百年

不刊之典臣未敢輕於議割也總之隨時體察川淮情形補偏救弊務在不戾時宜不墜憲章至湖南堵川之法前經臣國藩奏明俟湖北酌堵川鹽稍有起色續行奏辦現查湘省只有岳州常德澧州三屬行銷川鹽岳州係達省會之門戶常德係入辰沅之要津均爲淮鹽緊要口岸亦經議定專歸淮銷惟澧州與荊州相近川鹽運往路捷價輕應暫分與川銷其餘未盡事宜俟開辦數月再行酌核續陳

淮鹽西岸認運章程

第一條泰州設招商局 江路通暢亟應重整淮綱現於泰州設立招商總局本部堂札委大員駐局經理先辦江西口岸每

年定運十萬引仍照舊例以六百斤成引分作春秋兩綱毋論官紳商富悉准赴局具呈認辦以五百引爲始願多者聽少者不准挂號後限一月內領照開江逾限卽將所挂之號在銷每綱認足五萬引卽行截數本部堂已刊三聯護照發交泰州總局由局填發以照根留泰州存查以左照封寄江西總局以中照給商護運鹽與票離卽以私論

第二條江西設督銷局 規復引地以保價緝私爲要本部堂札委大員於江西省城設局專理售鹽定價扣釐緝私等事鹽船抵岸挂號後按所到先後榜示局門挨次發售不准爭先壓後亦不准私相授受跌價搶銷所售之鹽已頒發庫秤連皮包

過秤每百斤定價庫平文現銀三兩五錢不准絲毫短欠如銷市場旺由西局酌量出示提價至滯銷之時仍於所提價內酌減至賤以三兩五錢爲止以保商本

第三條三處截角查私 此次辦運改復綱鹽章程以六百斤

爲一引加滲耗六十斤包索三斤半每引分裝八包每包連包

索重八十六斤

未接此刊本章程之先業已裝十二包成引者聽之照斤扣算自見此刊本章程後概以八包

成由泰州抽查過秤將護票截去第一角運至安慶又抽查過秤截去第二角運至湖口又抽查過秤截去第三角如有包外夾帶私鹽毋論本商及船戶水手均照販私例治罪各商亦宜實給水脚銀錢毋稍尅扣免致水手帶私連累本商一經查出

重斤照全船包數扣算將鹽充公嗣後如無本部堂護照及未經按卡截角者一概不准過卡如違重究

第四條加重鄰私釐稅 江西十府例行淮鹽近年爲粵私浙私閩私侵佔奪我淮引之地應卽重稅鄰私俾鄰本重而淮本輕庶淮商之獲利較厚而鄰鹽亦可化私爲官現飭江西各釐局將鄰鹽釐稅加重閩鹽每斤征錢八文浙粵鹽每斤各征錢十二文責成各卡認真緝私嚴拏繞越以免偷漏其新章發售之淮鹽由西局另刊水程執照蓋用江西鹽道關防填給水販護運與鄰鹽之發給稅單者不相混淆經過淮引地面釐卡一律放行不准重抽絲毫留難片刻如鹽與執照相離者卽以私

論

第五條計算本利各款 棧鹽每引八包連正雜課暨鹽價在內約本銀五兩五錢二分繳泰州局費銀一錢八分都營賞犒銀四分八釐駁船江船商夥辛工棧租等費銀四兩四分二釐共計成本每引約銀九兩七錢九分正鹽六百斤西局售價銀二十一兩除每引由西局扣存各卡釐銀九兩四錢四分西局公費銀三錢外餘銀給還商本銀九兩七錢九分給商一分半息銀一兩四錢七分共銀十一兩三錢交商具領以利續運如遇暢銷之時提價至三兩五錢以外者所增之銀以三成給商三成解安慶糧臺四成解金陵大營至於商人自用之小費在

泰州具呈時應繳局費銀一錢八分到西岸後倉租棧租上力均係商人自行理料其售鹽時出倉下河等費出自水販一一預先說定各無爭競凡經本部堂核定數目如有私加及書役人等需索分支准商販稟明嚴行懲辦

第六條補完各處釐金 近年各路軍營皆賴抽釐濟餉如揚州大營鎮江大營金陵大營皖江南北水陸各營所設之卡皆以鹽釐爲大宗此次整頓淮綱斷不能仍完逐卡之釐而各軍需餉甚急又斷不能失此有著之款應令於初次起運暫緩完釐俟到江西銷售之後由西局彙總扣出江西釐銀每引一兩五錢由西局徑解吳城釐金局

彭部堂軍餉在內

其餘七兩九錢四分

均解安慶牙釐總局由該局分解金陵大營釐銀每引三兩四錢五分解揚鎮軍營釐銀每引一兩二錢解沙漫洲糧臺捐銀每引三錢二分安慶各卡每引銀二兩九錢七分內彭部堂營楊軍門營鮑軍門營韋軍志字營湘新後營祥後營善後局暨江外糧臺應分之銀向例歸安慶七卡者均在此項分之其李軍門通江關釐卡業經另籌每月一萬二千兩作抵江甯府楊守砲船釐金業經另支停止以每引計之則各軍所得較向來略少以一年全綱十萬引計之則各軍所得更多再加兩湖全綱則所得尤多矣只有初行兩個月略爲展緩到三四個月後則源源解還不誤各軍要需

第七條商運官運鹽一 本部堂現定新章重在商運期復綱鹽規模毋論官運營運總應與商販一律辦理不得絲毫取巧亦不得再立營運餉鹽名目至各營有借食鹽爲名私自下場採買希圖不完釐課卽與販私無異現已通行出示禁止如敢違犯無論何營員弁查出一律嚴辦

第八條沿途並無艱險 自克復九洲後長江一律肅清商船暢行現飭沿江水陸各營及沿途關卡凡新章准鹽經過驗明護照一體放行並派礮船護送不得需索分文留難片刻其儀徵九洲中關等由金陵大營會撫部院特派文武大員催餉防護可期暢行無阻如有雇船不慎舫兩有虧係各商照料

不周毋得借口短觴希圖減釐倘有遭風失水情事准其報明所在地方官勘詳一面申送泰州總局補運准免釐金一半如無地方官勘明切結不准請補

淮鹽運行皖岸章程

第一條勛兩改復舊制 淮南鹽務向以安徽爲中路現在西岸楚岸均照道光三十年章程以六百勛成引皖省應卽一律辦理茲定淮鹽販運安徽者專發護照每照一張運鹽一百二十引每引正鹽六百勛外加桶耗六十斤包索三斤半分裝入包每包連索過掣庫秤淨重八十六斤此外查出重斤卽以私

論

第二條大通設招商局 中路售鹽向以大通爲總匯本部堂
札委劉牧履祥駐紮大通設招商局專司中路招商驗照抽秤
收釐各事務惟大通鎮銷鹽暢滯無定上下口岸相距過秤不
能仿照楚西之法挨次銷售現另刊護照將下游大勝關金柱
關荻港大通四卡釐金全行緩納驗照放行俟鹽到大通每引
總完下四卡釐金錢六千文專充水路彭楊陸路會鮑四軍之
餉按人數之多少均勻分派運商完釐後卽將所領護照繳銷
由大局另給水程執照轉運他處口岸銷售自大通以上仍照
舊章逐卡完釐

第三條護照另繳軍餉 中路准鹽護照每年額定六百張發

交大通招商局劉牧招商承運此外不另發護照一張以一事
權凡各商販請領護照除應繳下四卡釐金外每護照一張另
繳報効軍需銀三百兩此項報効銀兩與楚西新章之提分商
利無異應專濟彭楊會鮑四營軍餉按人數之多少均勻分派
第四條計算成本數目 商販請領中路護照前赴泰棧買鹽
每引八包連正雜課暨鹽價在內約計銀五兩五錢二分應繳
報効需銀二兩五錢完揚鎮軍營釐銀一兩二錢沙漫洲糧臺
釐銀三錢二分都營犒賞銀四分八釐錢六千文照時價約合
銀四兩四錢完大通局費銀一錢五分共計每引約合成本銀
十六兩三錢三分八釐該局售價如遇暢銷之時聽局員斟酌

提價卽滯銷之時至少每百斤不得跌至三兩以內以保商本
如有不顧大局私行賤售搶跌者准衆商查出稟究議罰

第五條三處截角查私 運鹽過壩由泰州抽查過秤將護照
截去第一角運至大勝關又抽查過秤截去第二角運至大通
又抽查過秤截去第三角將照繳銷如有重斤夾帶均照販私
律嚴懲

淮鹽運行楚岸章程

第一條泰州設招商局 江路通暢亟應重整淮綱本部堂先
於泰州設立西岸招商總局札委大員駐局經理茲接辦楚岸
添派大員併歸一局辦理湖南每年定運入十六萬引照舊例以

六百斤成引分四季起運每季四萬引毋論官紳商富悉准赴局具呈認辦以五百引爲始願多者聽少者不准掛號後限一月內領照開江逾限卽將所掛之號註銷本部堂已刊三聯護照發交泰州總局由局填發以照根留泰州存查以中照給商護運以左照封寄漢口總局如有運赴湖南者在漢呈明由漢局將左照轉送南總局

第二條兩湖設督銷局 規復引地以保價緝私爲要本部堂札委大員於湖北之漢口鎮設立總局專理售鹽定價扣釐緝私等事鹽船抵岸掛號後按所到先後榜示局門挨次發售不准爭先壓後亦不准私相授受跌價搶銷兩湖所售之鹽已頒

發庫秤連皮包過秤每百斤定價庫平足紋現銀四兩不准絲毫短少如銷市暢旺由局員酌量出示提價至銷滯之時仍於所提價內酌減至賤以四兩爲止以保商本向有商販不至漢口卽於下游武穴田家鎮漳源口等處發售應另於入楚境之武穴地方設立分局仍歸漢口總局兼管照章辦理至湖南應另設督銷局業咨商湖南撫院會委大員督辦准鹽入湘另增水腳每引四錢准於售價內扣出連加分半利銀六分一併給還商人沿途概不完釐統俟鹽到湘後由局員照章扣解

第三條四處截角查私 此次辦運改復綱鹽章程以六百斤爲一引外加滷耗六十斤包索三斤半每引分裝八包每包連

包索重八十六斤由泰抽查過秤將護票截去第一角運至安慶又抽查過秤截去第二角運至武穴又抽查過秤截去第三角運赴湖南者再由漢口抽查過秤截去第四角如有包外夾帶私鹽毋論本商及船戶水手均照販私例治罪各商亦宜實給水脚銀錢毋稍尅扣免致水手帶私連累本商一經查出重斤照全船包數扣算將鹽充公嗣後如無本部堂護照及未按卡截角者一概不准過卡如有偷漏到岸卽照私販拏辦其漢鎮及湖南設局之後所有在岸舊鹽毋論官運營運一律歸局發售係已完釐課之鹽應如何補提餘利充餉由局員核明市價稟明辦理

第四條重加鄰私釐稅 湖南湖北均例行淮鹽近年爲粵私

川私潞私侵佔奪我淮引之地應卽重稅鄰私俾鄰本重而淮

本輕庶淮南之獲利較厚而鄰鹽亦可化私爲官現咨兩湖總

督部堂湖北巡撫部院將鄰鹽釐稅加抽川鹽入鄂於荊州加

抽釐錢每斤八文粵鹽入湘於衡州加抽釐錢每斤八文其錢

以五文歸兩淮鹽政重引地也以三文歸鄂湘督撫重卡地也

新章發售之淮鹽由鄂湘督銷局另刊水程執照蓋用湖北湖

南鹽道關防填給水販護運鄰鹽發給稅單亦蓋鹽道關防如

鄰私違抗不領稅單擅侵引地者本部堂派礮船緝拏鹽則入

官販則治罪至楚岸鹽行向係鹽務衙門專管應由總局委員

將現開各行造冊詳報如有欺商欠課得賄售私等弊隨時稟明拏究

第五條計算本利各款 棧鹽每引入包連正雜課暨鹽價在內約本銀五兩五錢二分又繳泰州局費銀一錢八分都營賞號銀四分八釐駁船江船商夥辛工棧租等費銀四兩四錢四分二釐共計湖北成本每引約銀十兩一錢九分正鹽六百斤漢局售價銀二十四兩除每引由楚局扣存釐稅銀十一兩九錢八分楚局公費銀三錢外餘銀給還商本銀十兩一錢九分給商一分半息銀一兩五錢三分共銀十一兩七錢二分交商具領以利續運其抽耗包索餘斤均准貼商以廣招徠如遇暢

銷之時提價至四兩以外者所增之銀以三成給商七成解安
慶糧臺至於商人自用之小費在泰州具呈時應繳局費銀一
錢八分到岸後船戶坐日等項均係商人自行理落其售鹽時
挑力等費出自水販一一預先說定各無爭競凡經本部堂核
定數目如有私加及書役人等需索分文准商販稟明嚴行懲
辦湖南成本每引加四錢六分給商餘俱照辦

第六條補完各處釐金 近年各路軍營皆賴抽釐濟餉如揚
州大營鎮江大營金陵大營江南北水陸各營所設之卡皆以
鹽釐爲大宗此次整頓淮綱斷不能仍完逐卡之釐而各營需
餉甚急又斷不能失此有著之款應令於初次起運暫緩完釐

湖北之鹽俟到漢岸售銷之後由漢局彙總扣出釐稅銀每引
十一兩九錢八分內應派楚釐銀四兩二錢每斤九文半解交湖北
牙釐局又應派楊鎮軍營釐銀每引一兩二錢又沙漫洲糧臺
釐銀每引三錢二分均解交揚州糧臺又九江關稅銀每引一
錢四分解交九江關道又安慶各卡每引銀二兩九錢七分解
交安慶牙釐局分解各營漢局所扣釐金除分派外尙餘銀三
兩一錢五分應解安慶糧臺湖南之鹽僅由湖北經過湖北不
能全收九文半之釐應以二文半歸鄂以七文歸湘其餘悉照
湖北之例由湘局彙總扣出除分解鄂釐及各軍外尙餘銀二
兩六錢九分亦解安慶糧臺其李軍門通江關釐卡業經另議

抵欵江甯府楊守礮船釐金業經另文停止至各軍應分之釐
只有初行時略爲展緩以後源源解還不致有誤

第七條商運官運畫一 本部堂現定新章重在商運期復綱
鹽規模毋論官運營運總應與商販一律辦理不得絲毫取巧
亦不得再立營運餉鹽名日至各營有借食鹽爲名私自下場
採買希圖不完釐課卽與販私無異現已出示禁止如敢違犯
毋論何營員弁查出一律嚴辦

第八條沿途並無艱險 自克復九洲後長江一律肅清商
船暢行現飭沿江水陸各營及沿途關卡凡新章准鹽經過驗
明護照一體放行並派礮船護送不得需索分文留難片刻其

儀徵九狀洲中關等處由金陵大營會撫部院特派文武大員
催償防護可期暢行無阻如有雇船不慎斤兩有虧係各商照
料不周毋得借口短斤希圖減釐倘有遺風失水情事准其報
明地方官勘詳一面申送泰州總局補運准免釐金一半如無
地方官勘明切結不准請補

淮北票鹽章程

第一條改復票鹽舊制 淮北票鹽立法本善自以鹽抵餉案
亂成規現在淮河暢通亟宜大加整理應將皖營滁營之餉鹽
漕轍之捐鹽徐台借運之北鹽營弁私運之毛鹽一概停止招
集新舊票販運鹽儲壩完納現課出湖運售每引例定正鹽四

百斤分緡四包每包連消耗壹百壹十斤其請票截角抽秤上
棧等事悉照票鹽成法辦理

第二條接開己未新綱 准北奏銷前已奏至戊午綱爲止應
卽接開己未新綱由海分司擇吉起征惟兵燹以後戶口大減
斷不能銷四十六萬引之數應循照近年奏案先辦正額二十
九萬六千九百八十二引責成海分司駐紮西壩或改駐楊庄
經理收課發販等事宜仍限一年造報奏銷以符定制

第三條核定正雜各款 收課科則必須核定以昭信守查推
北向例每引收報部正課銀壹兩五分一釐雜課二錢又外辦
經費銀四錢倉穀一分河費一分鹽捕管一分現開己未新綱

三
皆應照收其團練墾工緝費號項等名目均係不急之款應一
概刪除每引實收現銀一兩六錢八分一釐此外不准另案分
毫如有額外加征准商販指稟究辦

第四條裁并各處釐金 近來軍餉皆賴鹽釐接濟而長淮處
處設卡節節抽收商販視為畏途現在滁營釐卡業已停撤此
外亦應從新妥議仿照淮南總抽分解之法惟淮北票鹽不分
口岸聽販戶墮地運售與淮南稍有不同礙難緩釐應擇扼要
之處分作兩處抽收自西壩出湖先在五河設卡每包收釐錢
五百文運赴上游再於正陽關設卡每包收釐錢五百文統由
本部堂派委大員駐卡經收所需卡用經費卽在鹽釐內稟定

坐支不另取諸商販經此兩卡抽收之後給予釐票他卡驗票放行不准重抽以輕商本

第五條分派課釐數目 查淮北解餉原案係以十成分攤臨營分四成滁營分五成撫營分二成今滁州已歸併於督營臨淮已歸併於撫營嗣後所收北課除臨營仍解四成外其餘六成本應全解本部堂糧臺惟漕部堂停止捐鹽餉項不無短絀茲議分撥一成歸於漕轅以資貼補至五河正陽關兩卡總收鹽釐每包各五百文亦應照十成分派議以一成解漕部堂四成解安徽院五成解本部堂連同鹽課分濟接防滁州各軍及金陵大營餉需

第六條計算成本餘利 自場運壩之鹽每引除正雜課經費銀一兩六錢八分一釐照舊到壩完納外另需鹽價駁價每引七錢運腳辛工約六錢共計二兩九錢八分一釐西壩各棧售價應由海分司就近稽察每引至賤不准跌至三兩二錢以內如遇暢銷准其隨時提長禁止湖販賒欠一律以現銀交易至正陽關三河尖售價現在每引約在十兩內外壩鹽出湖加以運腳釐金不過七兩上下本部堂派淮揚水師節節護運無游匪搶劫之患其途甚安其利甚厚應由運司選派運判一員前赴該兩處往來督銷嚴禁搶跌賤售違者從重究罰

第七條嚴杜夾帶重斤 前因營弁下場自捆買斤放租無弊

不作甚至以一引官鹽夾數引私鹽大有害於票法疊經出示嚴禁在案嗣後毋論官運營運只准就壩採買不准下場亦不准再立餉鹽名目其下場票販類與卡員熟識遇有重斤往往瞻徇情面通融放過卡役人等兼有賣放之弊以致大伊山順清河等處秤掣有名無實殊屬不成事體應責成海分司嚴督各卡員認真抽秤查出包內重斤卽照全船包數扣罰充公如有包外夾帶嚴究詳辦

第八條禁止出湖改細 近來票鹽出湖皆在西壩改細大包重一百二三十斤不等以省運腳及按包抽釐之費改細後鹽票不符致有餘票護私之弊現在鹽釐一項業經本部堂大加

裁減未便再任避省運脚叢生弊竇應示諭車行船戶論斤不論包公平承僱出湖之鹽除例給護票外並由海分司發給艚口清單以便卡員憑單查艚按包抽釐不准再行改細以挽積弊而便稽查

再新章甫定誠恐湖販未盡週知或不踴躍各營旣停餉鹽勢難久待現課凡督轅撫轅漕轅皆可輔以官運以示倡導而速軍需重訂官運章程四條開列於左

一各轅籌款委員赴棧請票買鹽悉遵商運規矩概以現銀交易旣以體恤商販且不使官運本輕商運本重

一官運鹽船過卡驗票截角查艚完釐等事均照商運一律辦

理

一鹽斤到岸仍歸督銷委員稽查不准以軍餉藉詞搶跌賤售
一委員薪水由營自給餘利各歸各營充餉

兩淮鹽政瑣記

引 明初沿宋時子券之制改爲引目由部頒發 國朝因之
停綱以後不復請

窩 窩商守根窩爲業運商欲認引先付窩價將窩根領出填
明花名赴運司完納紙硃錢糧領硃單自裁鹽政卽將窩
根革除爲廢紙矣

單 商人先定紙硃發給硃單再完請單錢糧發給照單赴場

重鹽俟鹽運到橋再完呈綱銀兩發給引目再完加劬銀兩始准開江故諺云三檔錢糧請呈加也停綱後不用單而用護照其錢糧則到泰壩後並納無前此委曲繁重之弊

票從前所領之照單謂之皮票今因未領引目於完納錢糧後以護照請換運司所印大票與引同

重宋制開折中倉明制納粟給鹽謂之開中以是取鹽皆謂之中鹽今沿中字之義轉爲重讀作從

馬鹽記數皆謂之馬俗作碼運司收納呈綱錢糧造冊報院名爲底馬稽查火伏爲額馬掣鹽爲擺馬掣鹽時以二十

引爲一馬記數之帳謂之馬簿

匣 商總以公帳置之匣內謂之公匣故商名匣費

旂 儀徵開捆衆商雲集各豎一旂標明店號以便工人認識故立鹽店者謂之立旂

鍬 煎鹽官器漢唐曰牢盆宋曰盤今日鍬牢盆之制不可考今南場有廢盤一二角相傳家執一角須八九角合併始能熬鹽杜私煎之弊疑卽古之牢盆也舊盆亦有存者厚三四寸重三五千斤今所謂鍬止重一百四五十斤適用多矣

砵 砵秤錘也按行鹽一引之輕重鑄之有小砵爲掣子包所

用

八開 網鹽時有八開謂開徵開請開重開壩開橋開所開捆
開江也皆有費故非舊商不能辦亦不敢辦今則一律裁
革盡人能之

火伏 竈戶煎鹽以十二時爲一伏火應煎鹽一桶三四分竈
戶不能終歲煎鹽通年有定例多則一百二十日少則九
十日

子鹽 從前儀徵改捆均用小包名爲子鹽各岸有輕重湖廣
八斤四兩江西七斤四兩安慶及湖南邊鹽八斤甯國等
處食鹽每包五十斤爲中包今各岸一律自改票始

尾數 司算者至釐毫絲忽亦可止矣鹽務則於忽之下尙有微纖沙塵埃渺漠逡巡須臾清淨等十三字

長蘆鹽政

長蘆鹽引額數自順治康熙以來計口授食引目不能增廣而近年尤多停減其弊在引岸虛懸乏人認運而交款因以口絀浮費過重商力難紓而正供遂致暗虧言者多思祛除積弊而議旋格不行同治八年五月給事中陳鴻翔疏請整頓長蘆鹽務并擬章程十條下部核議奉

上諭著會同藩按照部議各條督飭長蘆運司將應辦事宜趕緊修舉應汰陋習實力掃除如尙有未盡事宜並著體察情形

酌擬章程具奏欽此 公覆疏曰臣奉

諭旨當卽恭錄札飭運司恆慶據實詳覆以憑核奏旋據該運司將鹽捐錢文津貼剝船一條先行詳請咨復其餘九條亦於六月間詳覆臣以其中利弊未能詳細釐剔所陳尙有不實不盡批令再行確查具詳九月初間又經另委候補知府李興銳馳赴天津按照原奏各條明查暗訪悉心考究據實稟復茲據該司及委員先後查復前來臣參觀互證酌擬辦法分條具陳如左

第一條認辦懸岸宜定期查蘆網認辦引地向例於具稟之後飭網查明是否家道殷實仍由本商自覓散商聯名出結具

保由綱總循例加結始由運司轉詳咨部更名一面給發行知
領引辦運此等層折原爲慎重課帑由來已久其中緊要關鍵
重在出結之保商不在加結畫押之總商其或商本實不充足
或外來人地生疎綱中無商承保則往返查訪稽延時日亦事
勢所常有並非該綱總等有意刁難藉端需索也惟新商認舉
之初辦干引者向令先交兩課銀一千餘兩不等名曰寄庫以
驗殷乏又認運租運捆運之外另有試運章程試之二三年果
不能辦准其稟退有寄庫則資本之證據早明有試運則本商
之進退裕如在綱總不必過於慎重徒啟壟斷之疑不以爲因
循廢公卽以爲靳惜美岸情近把持情同勒措嗣後新商具呈

但有散商聯名結保者卽令綱總酌定限期於二十日內加結畫押運司亦迅速發給行知庶衆商可資鼓舞

第二條保結商人宜專責成查長蘆向例新商入綱取具聯名商保保其家道殷實如有貽誤課運願甘分賠甘結惟各商因通綱向有隨引帶交參課銀兩遇有參商拖欠課欵除以查抄家產變抵不敷者均在商交參課內彌補是以從無保商攤賠之案迨至道光二十九年引岸參懸無商認辦懸課過多參課不敷彌補通綱添捐懸岸課一欵隨領引時每引交銀四分專補懸課之用無如懸岸日增歸補愈難所有續參商課雖逐岸飭令分賠總未據完交實銀查蘆綱商人多因誤運誤課其本

商名下自得保全出納者甚屬稀少若再責令分賠代人受過
並不予以年限難免不紛紛畏累遠避則蘆屬引地從此有參
無認殊於全局有碍自應量爲變通擬請仿照保固三年定限
如果三年正課之內認真貽誤課運被參卽將應交正課除將
查抄備抵外其餘參欠課銀分作三成在於參商名下追交二
成出結之散商加結之總商分賠一成如逾三年之期認商業
經完過奏銷引課可稱家道殷實卽與保商無涉以示限制似
此酌核辦理於課款分賠有著而於各商亦不致有畏累不保
之虞

第三條督催總商宜先完課查蘆商完課無論總商散商均照

通綱一律辦理近年奏銷後所欠勒限課銀委係累商欠交之
欸綱商名下應交正課均經依限催完惟向來章程每屆上課
之期運司派委鹽務候補數員率同綱總督催委員平日與衆
情誼不洽於鹽務底裏不明督催無權虛應故事每屆籠統完
至八分以上爲率而此八分中孰多孰寡孰先孰後無從稽考
是總商之拉勻擇算從中取巧其物議亦由此而起嗣後惟當
遵照部議飭令綱總首先完納每屆奏銷將總商另立簿冊散
商亦立一簿將已完幾成未完幾成據實登注隨同銷冊詳文
送鹽院衙門備查綱總無從牽拉衆商無從朦混開誠布公共
見共聞征收亦當日有起色

第四條捆運懸岸宜交全額查長蘆懸岸前於道光二十八年經欽差王大臣查辦鹽務案內將無商州縣五十五處除有州縣自行運銷者十一處無庸更改外其餘四十四處之河南懸岸二十州縣盡改票鹽仿照淮北成案先課後鹽毋論資本多寡一經交課給票護運直隸懸岸二十四處予限半年責令各州縣或招商或招販一律整理倘商販無人責成各州縣領運如州縣實有不能販理之處仍由鹽政遴員官運等因今查直隸各處懸岸除陸續招有新商具認外尚有豫屬之新鄭太康扶溝長葛直屬之成安開州並先經曾有商認辦復又參懸之豫屬鄆陵沈邱項城洧川又二十八年以後續經參懸引岸

除隨據新商接認外尚有南岸祥符許州采州臨潁鄆城直隸之永清邢臺鷄澤隆平鉅鹿衡水唐山曲周統計二十三處內除衡水現有新商稟認試辦外其餘各岸迭經該司出示招商並通飭各屬一體廣爲招募迄今無商認辦引岸虛懸民食堪虞自不得不照案飭官商民販招運藉濟民食以補課款惟捆運多寡無定原與包額認辦不同若輩維利是圖能多捆一包之鹽卽多獲一包之利亦未嘗不願多運多銷而卒之所運無幾蓋亦有故或因資本微薄無力多捆或因岸地滯銷有虧成本以致未能按額捆運現在旣准部議自應遵照飭令捆運之各官商如果情願包額認辦限一年之內出具認狀保結詳請

咨部更名一面由司另行招募新商稟認妥辦如有實在滯銷無商認辦之處每岸專彙詳咨不復以籠統浮詞搪塞蓋懸岸爲中外所同慮捆運乃鹽政之弊政本無所容其掩飾也

第五條長蘆綱總宜令更代查山東綱總雖係按年更換第山東先課後引長蘆先引後課綱引之責任兩不相侔換期太促必以甲年應完之課欸責成丙年之綱總督催恐此推彼諉之弊必且層見疊出且綱總爲通綱領袖要在遴選得人非其人卽一日一換無裨實政得其人卽累年不換亦愜輿情蘆商殷實者少殷實而認真辦事者尤少年年更換恐中選之人無多而廢弛之患滋甚現經運司於舊綱總四人之內挑留楊俊元

華楨斥退高淩漢黃昭融於本年六月具奏衆論尙屬允協嗣後綱總擬不必限定換期爲衆商所翕服者酌留接充如其不然隨時更換詳請咨部查察

第六條代銷融銷宜行分別查長蘆滯岸積引例准融與暢岸分成代銷當辦理融銷之初原爲蘆商疲累居多銷路又滯每至奏銷屆限雖引地積有成鹽而課項無措力不能完勢必紛紛參追各商以融鹽與融引事同一律稟請將積鹽融賣與別商銷售以所得之鹽價卽交庫抵課惟復價一項歸買商完交其餘一切課款仍由賣商按限呈納仍爲保全奏課起見同治三年前任督臣劉長佑奏復河南撫臣張之萬奏參蘆商把持

案內將融銷引鹽一層業經詳細聲明有案可稽檢查近三年案卷亦係疲累之商或因正課無措或因復價到限無力措交不得已遂將所運之鹽融賣與別商運赴暢岸銷售其所得價銀由買商呈出交官以濟目前之急是賣商得價融銷卽與自運銷售無異在買商既經按包交價並非得無課之鹽在賣商鹽已收價亦非上無鹽之課融賣融買事出兩商情願並非買商圖得便宜致有弊竇且代銷與融銷稍異之處代銷則賣主津貼銀每引三錢五六分至四錢不等其正雜稞復價等課概歸買主完納融銷則買主代銷正課六錢復價五錢解費二分一釐其餘各款仍由賣主自行完納代銷則賣主出津貼之費

融銷則賣主有自納之歛其辦法不同而使累商得稍資周轉則同賣者買者彼此扣算定價兩相情願則亦同所有各商融銷引鹽除捆運之商仍遵三年奏案飭令一概領引運鹽不准融銷外其行商融鹽應請照舊辦理免其禁革以保額綱而重帑項

第七條歷年積欠宜令代交查歸補庫墊積欠一項自道光二十八年清查案內共計銀二千三百四十三萬一千四百餘兩每年議交庫墊銀六萬兩積欠銀十一萬兩分年按引攤交每引攤銀二錢四分零自同治二年起因商力拮据改爲外引撥出銀一錢二分京引撥出銀八分領引時隨引完納其餘銀兩

仍照案按限帶交嗣於同治五年因綱情愈疲稟請外引減交銀一錢京引減交銀六分自道光二十九年起到咸豐八年止除已完現商淨欠交銀五十九萬八千三百三十餘兩業經奏奉部覆准自咸豐十一年奏銷後分作五年代完又自咸豐九年起至同治七年止續應徵銀一百七十萬兩內除參懸無著銀四十九萬九千二百四十餘兩永平七屬官辦暨天津公共口岸未撥銀四萬四千二百三十餘兩現商應交銀一百十五萬六千五百二十餘兩內已完銀三十五萬六千七百餘兩連前實計現商共未完銀一百三十九萬八千一百五十餘兩其已交銀兩均經奏撥各餉動用按季冊報在案其欠交銀兩雖

屢經嚴諭飭催無如各商愈稱因近年引地被擾被災領運失時額引滯銷商力拮据顧運顧課已屬萬分竭蹶前項積欠交代前商參累之歟一時無力賠交委屬實情且近年參商迭出長蘆懸岸已屬不少若以此紛紛參辦通綱無商不欠幾至無岸不懸全綱掣動所關非細茲准部議除將欠交銀兩趕緊設法嚴行催交以清積欠外所有隨引先交之歟按每年出庫引數核計應完數目造入春秋撥冊聽候部撥至於欲紓商力必減成本臣當另案陳奏

第八條報災補運宜再詳查查各州縣詳報被搶被水各商引鹽有詳運司已經委員會勘尚未勘覆詳報者是以失鹽數目

卽院司兩處案卷已覺未能相符茲據該司逐細詳查除奉部復准補運五六等年被梟匪髮逆燒搶之甯晉臨城杞縣七年被捻逆焚搶之定州南樂清豐大名開州東明臨漳等州縣商人益德裕等被搶失鹽一萬六千零二十九包不計外實在現據委員勘復陸續詳報之清苑等處商人被搶失鹽四萬五千六百七十七包又新城等州縣被水衝淹鹽一萬八千六百三十一包又已委未經復勘之濟源等州縣並未經委勘之安平縣商人被搶失鹽一萬零八百五十六包又因案情未符批飭覆查未據詳覆之溫縣等處商人在途被搶失鹽三千二百四十六包除由司核明照例分案敘詳並將未經通詳之各州縣

分飭另行補報以昭核實外所有州縣商名鹽數分別另造清冊呈送備查謹將原冊封送軍機處並分咨戶部以備考核
第九條加斤抽錢宜行禁止查道光二十八年清查案內每包加鹽一百五十斤合計北鹽重五百六十七斤有奇南鹽重五百七十二斤有奇違者卽以私論各商赴坵築鹽向由批驗所大使驗明秤掣按包編號之後始行飭商裝運前奉部飭卽經該運司明查暗訪出示嚴禁並親赴關所查照鹽包挨次編列號數按包抽提當堂秤掣均屬相符訊據各商僉稱伊等赴坵按引築包均由批驗大使查驗秤掣編號有一鹽卽有一引造關時按號抽提過秤既有官司稽查又有部砵斤兩衆目共觀

非商等所能行私朦混且伊等深知例禁森嚴亦當自顧身家何肯犯法取利至造關時裝載備掣者卽係批驗所過秤編號之引鹽此外實在並無另有私築號鹽意圖挾斤情事復飭據小直沽批驗所大使王鳳綱以查明各商赴坵築運均係遵部砵斤兩一律辦理並無夾斤加帶另築號鹽以備掣抽情弊出具印結詳送到司該司恐尙有不實不盡復經連日逐細查訪僉稱如一此後惟有嚴益加嚴督飭委員及批驗大使認真秤掣不時密查倘有好商夾私加斤情弊立即照例從嚴懲辦臣亦當不時由省委員赴津密查掣驗事宜不敢稍存姑息以杜流弊而肅鹽政至隨引每包抽收津貼錢五十文乃係同治六

年海運案內各商公議捐以作津貼漕剝民船之用並無浮收與抑勒情弊業經另行詳明咨部覆准在案

第十條墨筆科則宜加裁革查道光二十八年 欽差王大臣查辦鹽務核定科則曰正雜課曰平飯曰補欠曰歸補積欠曰王范滿垣租息曰領告雜費曰緝費曰各項解費曰內外帑利共九款每引攤交銀二兩六釐刊單通行飭商遵照此木板之則也復有續增商捐款項因年限多寡並無一定一經捐足卽由各商隨時稟請停止並非作爲定額是以向用墨筆添寫刊單之後同治三年河南撫臣張之萬奏參蘆商把持運使受其矇蔽案內指稱墨筆私加私用經前運司克明查出墨筆添寫

者曰懸岸課曰捐補參價曰欽天監生息曰歸補緝費曰口岸
汛工曰籌補津貼曰還墊辦公曰酌增領告曰朝袍冊寶曰修
署曰報効軍需曰隨引復價凡十二款當將墨筆原委逐款造
冊由前督臣劉長佑奏覆有案可稽嗣將朝袍冊寶六釐修署
一分報効軍需二分三項先後停止同治六七年間因迭奉內
務府奏派長蘆採辦絹箋以及蘆勇口糧並捐築金隄挖府河
等事增添一欸初曰寄庫還欸改曰金隄還欸其餘均照前奏
之數並無絲毫加增此外又有南場各商稟添大河口巡費一
欸南引各商捐添報効豫省協餉一欸係不在通綱科則之列
皆墨筆之則也至所稱領引時外交者三欸查有津貼辦貢一

欸因前辦彩緞貢商人張鑑歷年賠累各舊商公議情願每引
津貼辦貢銀三分五釐又津貼辦公一欸因總商辦公一切費
用出自己囊衆商公議願每引幫貼辦公銀六釐迨因舊商星
散新商心力不齊完交寥寥本年已將此二欸停止矣至巡費
津貼一欸係承辦青靜滄藍四處引地緝費裁減不敷通網公
議每引願幫銀四釐此爲保護引地而設應仍其舊斯三者外
交幫貼之則也據該運司造具木板科則一冊續增墨筆一冊
外交幫貼一冊並將領告科則欸式呈送前來理合封送軍機
處並分咨戶部備查至部議以浮費過重行令認真釐剔分別
禁止臣亦深知蘆綱之疲由於成本太重銷路太滯而衆商亦

稟訴苦累情形呈請拯救頃至天津與運司面商一切卽日將各項科則酌擬裁減以輕成本而挽頽綱

以上十條就部文所指者逐細登覆至於引滯商疲全綱不振別圖補救之方容卽酌減科則案內另行具陳 十一月公上疏曰竊照給事中陳鴻翔條奏長蘆鹽務一摺奉

旨飭臣體察情形酌擬具奏臣已按照十條逐一確查分晰覆奏惟於裁革科則一條僅先將原定木板科則續增筆墨科則並外交幫貼三款按項分晰臚陳其如何酌擬裁減聲明卽日另奏在案伏查長蘆鹽務自道光中年以來疲乏已久至二十八年 欽差王大臣載銓等查辦加斤減價裁費恤商科則僅

二兩六釐有奇滿擬商力可紓乃因加斤而未及減引銷數仍
形疲滯咸豐同治年間領引科則屢次遞增較查辦時加至三
分之一加以私梟迭起侵佔搶掠捻逆縱橫擾亂焚毀衆商虧
累日深本年銀價昂貴每兩換制錢一千八百上下而滹沱河
北徒順廣等處之引不能行舟到廠大清河枯旱保定等處之
引到岸過於遲滯豫省加價黃河以南之引盡被鄰私侵灌各
商之難處不同而累狀則無少異莫不由於交款太多成本太
重銷路太滯前據通綱商人聯名稟訴疾苦嗣於雙口途次又
據京引商人聯名投訴臣委員至天津明查暗訪又接晤運司
恆慶均稱商情疲憊若不趕緊調濟勢必家家受累處處參懸

臣囑該司通盤籌計務求有益於商人而又不甚礙於庫欸斟酌裁減以期變通盡利茲據該運司恆慶核議詳覆前來臣細加參核理合奏懇

恩施曲加矜恤以甦商困而保額綱謹分條陳列於左

一木板科則中二欸可暫停也查原定木板科則共九欸業於十月初二日造冊具奏內除七欸無可裁減外惟第三欸曰補欠銀八分七釐九毫有奇第四欸曰歸補積欠銀一錢六分一釐一毫有奇此二欸係因積欠太鉅道光二十八年議定每年歸完銀十七萬兩由各商按引攤交彌補舊欠是虧欠者乃數十年前之商捐補者乃數十年以後之商李代桃僵本屬勉強

從事嗣因各商拖欠不完於同治二年起改爲隨領引時外引
先交銀一錢二分京引先交八分其餘銀兩仍照案依限催交
同治五年綱情愈疲又改爲外引交銀一錢京引交銀六分每
年按出庫引數約納銀五萬餘兩前奉戶部飭撥以備長蘆採
辦布疋絲斤之用目下通綱疲累異常現商辦運交課自顧不
遑更無餘力代完舊商之欠擬請將隨引攤交補欠歸補積欠
銀兩暫行停止五六年後如鹽務稍有起色察看情形再行酌
量征收以蘇商困嗣後如遇傳派長蘆採買布疋絲斤並請仍
由引課項下動支報部核銷

一續增墨筆科則中二款可減五款可裁也查墨筆添寫科則

共十一款業經造冊具奏內除四款無可裁減外擬酌減者二款全減者五款其酌減者一曰軍需復價外引銀五錢京引二錢五分此項復價原爲天津海防軍需而設每年按出庫之引約征銀二十餘萬兩每月撥解天津支應局六千兩解保定省局一萬一千兩間或另文提用爲數更增目下餉需依舊本難議減惟念商力日形拮据不得不量爲核減以全大局擬請外引減去一錢四分每引交銀三錢六分京引減去七分每引交銀一錢八分隨領引時外引交銀九分京引交銀四分五釐下餘外引二錢七分京引一錢三分五釐仍照案以三個月爲一限分作三項完納一曰金堤還款銀三分六釐此款前因迭奉

內務府傳辦絹箋並劉景芳蘆勇口糧每引捐交二分六釐名曰寄庫還欸嗣因修築金堤挑挖府河捐賑等項增爲三分六釐改名曰金堤還欸計運庫墊發之欸商捐歸補尙有不敷當此綱情疲敝不得不設法恤商所有金堤還欸擬減去一分六釐酌留二分嗣後遇有內務府傳辦絹箋價值運費擬請作正開銷直字營馬隊餉需責令運司另行籌解奏咨辦理右二者皆可酌減者也其全裁者一日復價解費二分一釐三毫擬卽在於木刻解費項下通融搭解一日籌補津貼銀三分此欸現已捐交足數矣一日懸岸課銀四分此欸自道光二十九年飭商攤賠參懸無着之課欸衆商求免未允嗣後改爲蘆團經

費同治五年正月間各商稟請豫省免抽鹽釐案內又改爲協濟豫餉之用名實久已不符擬請停止豫省協餉免捐此款以紓商困一日還墊辦公銀一分此係昔年商墊軍營米麵天津壕墻之用今早已歸欵矣一日酌增領告銀二分此款係咸豐十年所增應卽裁除其中有應行支解者可由木刻之領告雜費項下酌量籌撥右五者皆可全裁者也至此次墨筆欵目比上次所奏欵目微有參差上次未列復價解費一欵此次未列大河口巡費協濟豫餉二欵耳

一京引商人宜加補救也查京引原額十萬五千九百餘道從前銷六成滯四成自道光元年以後減引二次停引一次爭行

銷引七萬二百餘道銷數已不及前道光二十八年 欽差王大臣查辦鹽務每包加鹽一百五十斤未曾減引從此滯銷更甚自京師行使大錢諸行蕭索每年銷鹽不過二萬六七千包是所銷不過三成七八分其餘六成二三分均係滯銷之數以二萬六七千包之鹽價上七萬餘引之課款是一引幾及三課包賠過鉅商力如何能支且百物均隨銀價長落惟賣鹽例皆用錢而完交課款又須易銀目今銀價日昂展轉虧賠加以引多商衆殷乏不一心志不齊此商賤價求售彼商卽被牽掣同治四年衆商設立內廠收鹽亦恐搶跌賤售之故奈資本有限價仍難齊緣京引累商較多辦運交課悉由重息借貸鹽旣運

出公私交迫本京油鹽店窺見底裏又復多方勒措累商圖得現銀暫應眉急不得不賤價濫售一喝百隨卽殷商亦難自立成本虧折愈辦愈累刻下雖將利則漸減輕而滯銷太多包課太重仍不足蘇其困茲據運司核議具詳擬懇

天恩飭下該部俯念京綱苦累實情准自同治九年起暫停額引二萬道俾包課略輕商力可漸舒展餘存額引五萬二百餘道督令勉力辦運俟綱情稍轉行市暢旺再行相機議加

一河南加價宜請停免也河南撫臣前因防剿兵多餉無所出奏明豫鹽每斤加制錢二文先由商人按包總交雖日取之於民並非取之於商惟其價先由商墊商已不勝其累屢次求免

未允不得已稟明每年捐銀八萬兩分四月十月兩次呈交無如豫引運道過遠成本過重上年被災被擾商本虧折辦運益覺艱難今年請領引目不及十分之七現計每引按四錢六分派攤不敷呈解之數且河南一省分食潞淮東蘆四省之鹽減價尙不能敵私一經加減則別省私鹽更易侵灌充斥商賈惟利是趨居民擇賤而食三路皆賤蘆鹽獨貴孰肯舍彼而取此滯銷愈甚攤數愈多近年各商除逃匿參懸外餘均岌岌自危有朝不保暮之勢刻下中原肅清豫省兵數可減商力實在不支應請

旨勅下河南撫臣准將加價停免不使南引各商捐此八萬兩

之數蘆綱幸甚

一山東館陶釐捐宜請停止也山東撫臣前因逆氛孔熾防餉難籌因就館陶設局抽釐凡豫引鹽船由此經過者每包抽收津錢三百六十文以備接濟餉需在東省積少成多籌款不無小補在蘆商筋疲力困元氣實已大虧現在軍務已靖餉項稍紓本省應用款項尙爲分別可緩可停普將科則裁減以輕成本此項釐捐應請

皇上飭令山東撫臣將館陶鹽釐准予停免以紓商力

以上五條第三條專恤京引之商四五條專恤南引之商第一二條則爲通綱商人力籌挽救之法計木板刊刻並墨筆添寫

之科則連閭每引銀二兩七錢三分七釐六毫有奇今裁減銀五錢二分六釐三毫有奇尙存銀二兩二錢一分一釐二毫有奇雖較之道光二十八年查辦時尙多二錢有餘而較之近年已覺輕減衆商稍有轉機不至相對歛歔但得此後不復參懸懸岸漸可認辦則名爲恤商而裕課亦卽寓其中至漳沱河改道下西河舟運不通臣已屢次派員查勘俟勘定後當奏明籌款挑挖一律深通務期暢行無阻俾西河各商免受改道改厰之累長蘆鹽務可望漸有轉機感荷

天恩實無涯矣

求闕齋弟子記卷二十九